

# Formulier om de kristlike doop te betsjinjen oan folwûksenen, dy't harren by de tsjerke jouwe

Gemeente fan ús Hear Jezus Kristus,

## *Oer de doop*

By de doop wurdst alhiel ûnder dompele yn wetter of dermei besprinkele. Sa is te sjen datst yn de eagen fan God smoarch biste, datst ûnder de sûnde sitst.

Do bist al skuldich ast berne wurdst, "sûndich wiest al, doe't dyn mem swier fan dy waard"<sup>1</sup>.

Sa kin God dy net akseptearje.

Do kinst syn keninkryk allinne mar yngean ast op 'en nij berne wurdst<sup>2</sup> en in nij libben krigest.

De doop wol dy dus beseffe litte hoe'n ferkeardeling datst biste.

Dan kinst allinne noch mar lytsman wurde foar God, want do kinst dysels net rêde.

Allinnich Jezus Kristus kin dat, troch dyn smoargens skjin te waskjen en troch dy in nij libben te jaan<sup>3</sup>.

De doop is in teken en segel dat Jezus Kristus dy yndied skjin waskje wol<sup>4</sup>. Hysels hat ommers de opdracht jûn om te dopen yn de namme fan de Heit en de Soan en de Hillige Geast<sup>5</sup>.

Troch dyn doop jout God *de Heit* de garânsje dat Hy in ivich genedeverbûn mei dy slút<sup>6</sup>. Hy nimt dy oan as syn bern en erfgenamt<sup>7</sup>. Hy sil altyd foar dy soargje<sup>8</sup>. It kwea hâldt Er fan dy wei of Hy lit it meihelpe te'n goeden<sup>9</sup>.

---

<sup>1</sup> Ps. 51:7.

<sup>2</sup> Ezech. 36:25-27; Joh.3:3.

<sup>3</sup> Hann. 4:12.

<sup>4</sup> 1 Kor. 6:11; Hann. 22:16.

<sup>5</sup> Mat. 28:19.

<sup>6</sup> Gen. 17:1,2,7.

<sup>7</sup> Rom. 8:15-17.

<sup>8</sup> Mat. 6:25-33.

<sup>9</sup> Rom. 8:28.

*De Soan* jout de garânsje dat Er al dyn sûnden fan dy weinimt. Hy lit dy folslein diele yn syn dea en opstanning en Hy jout dy in nij libben.

Hy jout dy ek syn eigen folsleine suverens. Hy soarget derfoar dat God dy frijsprekt<sup>10</sup>.

*De Hillige Geast* garandearret dy, dat Er by dy ynwenjen komt<sup>11</sup>. Hy makket dy ien mei Kristus. Hy makket dat, watst al yn Kristus hast, ta dyn persoanlik eigendom<sup>12</sup>. Dêrtroch silst ienris folslein suver wêze.<sup>13</sup>

Dan silst ivich libje yn it fermidden fan it folk, dat God útkard hat.

Do, fan dyn kant<sup>14</sup>, hast no de plicht om sa om Gods sizzen te jaan as it heart by it nije libben. Do moast leauwe yn de iene God - Heit, Soan en Hillige Geast - en Him "leafhawwe mei dyn hiele hert, mei dyn hiele siele, mei dyn hiele ferstân en mei al dyn macht"<sup>15</sup>. Do moastst brekke mei de wrâld fan de sûnde, ôfstjerre litte wat sûndich yn dy is en do moastst fol ûntsach foar God libje<sup>16</sup>.

En ast út swakte ferfalst ta sûnde, dan hoechst dochs net oan de genede fan God te twifeljen<sup>17</sup>. Do hoechst dy der ek net by del te lizzen datst no ien kear sûndich biste. Dyn doop is ommers de garânsje dat God foar ivich in ferbûn mei dy sletten hat<sup>18</sup>.

### *Oer de dopeling*

Folwûksenen wurde doopt, wannear't se ta ynkear kaam binne, harren sûnden beliden hawwe en belidenis dien hawwe fan harren leauwen yn Kristus.<sup>19</sup>

---

<sup>10</sup> Hann. 2:38; 1 Joh. 1:7; Rom. 6:4; Kol. 2:12.

<sup>11</sup> 1 Kor. 6:19.

<sup>12</sup> Ef. 1:13.

<sup>13</sup> Ef. 5:27.

<sup>14</sup> Gen. 17:1,9.

<sup>15</sup> Deut. 6:5; Mat. 22:37.

<sup>16</sup> Ps. 103:17,18; Ef. 4:17-5:12; Kol. 3:5-10.

<sup>17</sup> 1 Joh. 1:9; 3:20.

<sup>18</sup> Jes. 54:10; 2 Tim. 2:19.

<sup>19</sup> Hann. 2:38; Mark. 16:16.

Want doe't Johannes de Doper de minsken oprôp om harren dope te litten om sa ferjouwing fan de sûnden te krijen<sup>20</sup>, hat er allinne de minsken doopt, dy't harren sûnden beliden hiene.

Fierders hat ús Hear Jezus Kristus sels syn apostels it befel jûn "meitsje alle folken learlingen fan My, doop harren yn 'e namme fan de Heit en fan de Soan en fan de Hillige Geast"<sup>21</sup>.

Jezus hat doe ek beloofd: "Wa't leaut en doopt is, sil behâlden wurde"<sup>22</sup>. Neffens dizze regel hawwe dan ek de apostels allinne dy folwûksenen doopt dy't mei berou harren leauwen beliden hiene.<sup>23</sup>

Dêrom doopt de tsjerke allinnich dy folwûksenen dy't de rike ynhâld fan de doop út it evangelje leard hawwe te begripen en fan harren leauwen rekkenskip ôflizze troch harren persoanlike belidenis.

### *Gebed foar de doop*

Almachtige, ivige God. Jo hawwe as in rjochtfeardige rjochter de ûnleauwige wrâld ienris straft troch de sûndfloed. Mar Noach en syn húshâlding hawwe Jo yn jo grutte barmhertigens rêden. It hiele leger fan de stiifkoppige farao fan Egypte hawwe Jo omkomme litten yn de Reidsee, mar Jo hawwe yn jo barmhertigens jo folk Israël troch dyselde see, as oer droech lân gean litten. Yn beide foarfallen hawwe Jo doe al wat fan de doop sjen litten<sup>24</sup>.

Wy bidde Jo, barmhertich as Jo binne, N.N. ek genedich te wêzen.

Meitsje him/har troch jo Hillige Geast ien mei Jezus Kristus. Lit him/har troch de doop mei jo Soan yn dy syn dea begroeven wêze en mei Him opstean yn in nij libben. Lit him/har eltse dei fol goede moed syn/har krús drage, Kristus efternei, oan Him ferbûn mei in wier leauwen, fêste hope en in brânende leafde. Jou dat hy/sy ienris, wis fan jo beloften, dit libben ferlitte sil en frijmoedich ferskine sil foar Jezus Kristus, syn/har rjochter en rêder. Ferhear ús út namme fan Jezus

---

<sup>20</sup> Mark. 1:4,5.

<sup>21</sup> Mat. 28:19.

<sup>22</sup> Mark. 16:16

<sup>23</sup> Hann. 2:41.

<sup>24</sup> 1 Petr. 3:21; 1 Kor. 10:2.

Kristus, jo Soan, dy't mei Jo en de Hillige Geast, ien ienich God, libbet en regearret oant yn ivichheid.

Amen.

### *Fragen oan de dopeling*

Leave broer /suster.

Do stietst hjir foar God en syn hillige gemeente om dyn leauwen te beliden.  
Ik freegje dy om earlik antwurd te jaan op de folgjende fragen.

Leauwsto yn God de Heit, de Almachtige, skepper fan himel en ierde, en yn Jezus Kristus, syn iennichstberne Soan, ús Hear, en yn de Hillige Geast, de trije-iennige God<sup>25</sup> fan dyn doop?

Jousto ta datst sûndich en skuldich yn 'e wrâld kommen biste en datst fan natuere net dwaan kinste wat goed is yn 'e eagen fan God?

Besefsto datst dêrom bleatstietst oan de grime fan God?<sup>26</sup>

Bekensto datst de geboaden fan de Hear gauris oertrêden haste mei sûndige gedachten, wurden en dieden?

Hasto dêr berou oer?

Leauwsto dat Jezus Kristus dy as dyn ferlosser jûn is en datst troch de krêft fan de Hillige geast in diel fan fan syn lichem wurdst<sup>27</sup>?

Leauwsto dat God dy troch it bloed fan Kristus al dyn sûnden ferjout?<sup>28</sup>

**Beliidsto** dat de lear fan it Alde en Nije Testamint, sa 't dy yn de Apostoalyske belidenis fan it Leauwe gearfette is en yn dizze gemeente ferkundige wurdt, de wiere en folsleine lear fan de ferlossing is?<sup>29</sup>

---

<sup>25</sup> Mat. 3:16,17; Gen. 1:1.

<sup>26</sup> Ps. 51:7; Rom. 7:18.

<sup>27</sup> Yn de belidenisfragen: '...in diel fan syn lichem biste?'

<sup>28</sup> 1 Kor. 1:8,9.

<sup>29</sup> 2 Tim. 3:16.

Silsto, salang datst libbest, by dizze belidenis bliuwe en alles fersmite wat tsjin it Wurd fan God yngiet?<sup>30</sup>

Nimsto de belofte en de ferplichting fan it genedeverbûn fan God, dêr't de doop in teken en segel fan is, oan?

Ferlangsto dernei om God en dyn neiste leaf te hawwen, mei de wrâld fan 'e sûnde te brekken, wat sûndich yn dy is ôfstjerre te litten en fol fan ûntsach foar God te libjen?<sup>31</sup>

Beloofsto om tsjinstber te wêzen oan de gemeente, trouw mei har nei it Wurd te harkjen en it hillich Nachtmiel te brûken?

Silsto dy gewillich deljaan ûnder alle kristlike fermoanningen?<sup>32</sup>

Wat is dêrop dyn antwurd? (Ja)

### *Segenbea*

“De God, dy't alle genede jout, hat dy roppen ta syn ivige hearlikheid yn mienskip mei Kristus. Hysels sil dy ek folslein, fêst en sterk meitsje en jimme in heech fûnemint jaan, nei't jimme in koarte tiid lit hawwe. Sines is de macht foar ivich en altiten.<sup>33</sup> Amen”.

### *Of*

“De God dy't frede jout, hat ús Hear Jezus út de deaden werombrocht, de hoeder fan 'e skiep, dy't grut is troch syn dea, dêr't Er in ivich ferbûn fersegele hat. Mei dy God dy yn steat stelle ta alle goeds, om te dwaan wat Hy wol en yn ús wurkje wat Him oanstiet, troch Jezus Kristus. Oan Him mei de gloarje wêze yn der yvichheid.<sup>34</sup> Amen”.

---

<sup>30</sup> Mat. 24:13; 2 Tim. 4:3-5; Hebr. 10:24,25.

<sup>31</sup> Ps. 119:10; 1 Joh. 2:15-17.

<sup>32</sup> Hebr. 13:17.

<sup>33</sup> 1 Petr.5:10-11.

<sup>34</sup> Hebr. 13:20,21.

*Betsjinning fan de doop*

N.N. (*folsleine namme*), ik doopje dy yn de namme fan de Heit en de Soan en de Hillige Geast.<sup>35</sup>

*Oprop oan de gemeente*

Leave broers en susters, ûntfang as gemeente dizze broer/suster mei leafde yn jimme fermidden. Wit dat jimme roppen binne om him/har te stypjen troch jimme foarbea en jimme foarbyld.

Wannear't dat nedich en mooglik is, moatte jimme ree wêze om yn 'e praktyk deroan mei te helpen dat dizze broer/suster groeit yn it leauwen, de genede en it kennen fan ús Hear Jezus Kristus. Want, "Wy allegearre, ..., binne ommers sa yn ien Geast doopt, dat wy binne ien lichem"<sup>36</sup>.

Mei de Hear ús, troch syn Geast, hjirby helpe.

*Tankgebed*

Barmhertige God en Heit, tankber priizgje wy Jo, want Jo ferjouwe ús en ús bern al ús sûnden. Jo hawwe ús as leden fan jo Soan en sa as jo bern oannaam.

Yn 'e namme fan Jezus bidde wy foar dizze broer/suster: Lied him/har altyd troch jo Geast. Lit him/har neffens jo wurd libje en lit him/har yn Kristus geastlike groeie.

Dan sil er/sy jo goedens en barmhertigens erkenne en dêrfan tsjûgje. Lit him/har hearrich ús ienige learaar, kening en hegepreester, Jezus Kristus folgje. Dan sil er/sy moedich stride tsjin 'e sûnde, de duvel en syn hiele ryk.

Jou him/har de oerwinning, dat er/sy sadwaande Jo, de ienichste en betroubere God – Heit, Soan en Hillige Geast – ivich loovje sil.

Amen.

---

<sup>35</sup> Mat. 28:19.

<sup>36</sup> 1 Kor. 12:13.